

八德之門

DJIP TEK TJI BOEN

PEMIMPIN

KA DJALAN KABEDJIKAN.



Djilid ka 26. Kah Tjoe 2475. T.H.B.K. XIII.

提倡孔道以止亂圖治論（吳絳珠女士緒論）

今日之中國·一極無道之中國也·亦極紛亂之中國也·極難治之中國也·推原其故·巧言亂德者有之·辯言亂政者有之·巧言亂德·德之賊也·辯言亂政·政之蠹也·德之賊卽道之賊·此而欲止亂·亂何由止此而欲圖治·治又何由圖也·然則止亂·果有何策·圖治果有何方哉·必也其提倡孔道乎·夫孔子之道公而已矣·公則無私·彼植黨營私者以孔道正之·可以化除私見矣·假公以濟私者·以孔道匡之·可以滌革私心矣·於是持論皆公論·存理皆公理·公是公非·一秉至公矣·孔道也歟哉·公道也·道在四術·詩書禮樂·道在四端·仁義禮智·明道之書累萬言·大旨不離乎忠恕·傳道之文垂萬古·庸行不外乎倫常·中心之謂忠·如心之謂恕·散之則萬殊·合之則一貫·人倫以正本·綱常以清源·推之則四海·反之則一家·今欲遏禍亂之萌芽·窮仁治之根柢·又莫先於孝悌·果使入則孝·出則悌·親其親·長其長·則犯

上作亂何有乎·由是視之·家齊國治·捷於桴鼓矣·政平事治·敏若蒲盧矣·十載亂戡而不足·一朝治定而有餘者·道在則然也·是道也·何道也·孔子之公道也·公其心以牖民則壇篋也·公其言以警衆則韜鐸也·教人而大公無我·則文明鼓吹·鄧治馨香·干羽陳則子戈化·全玉振則金革銷·其明效大驗·遂捷於影響·孔子之道·其有裨於天下國者其淺鮮哉·有是哉·經正民興·聖人之御宇·無黨無偏也·有是哉·勝殘去殺·善人之爲邦·惟精惟一也·執是而論·忠信以爲甲冑·禮義以爲干櫓·已亂其庶幾乎·仁壽而登衽席·會盟而耀冠裳·圖治其庶幾乎·孔子之道有益於天下國家也·如此·今中國之人奈何不爲之提倡乎·

入德之門

Ejin Tek Eji Bon

Diterbitken boeat moeat salinan-salinan isinja kitab-kitab dari

Nabi Agoeng KHONG HOE TJOE

dan lain-lain kitab jang soetji.

Dibagi-bagiken pada anggota-anggota dari:
KHONG KAUW HWEE, - SOERABAIA.

ISINJA:

- 1 Heh Loen Tee Sip It,
- 2 Le Tji Jauw,
- 3 Siaoh Hak Tjip Kay,
- 4 Tiong Jong.
- 5 Khong Tjoe Gi Liok.
- 6 Too Tek Gi Liok.
- 7 Kaij Tjeeng.

下論第十一

HEH LOEN TEE SIP IT.

Kitab Heh Loen hoofdstuk 11.

季氏富於周公. 而求也爲之聚
斂而附益之. 子曰. 非吾徒也.
小子鳴鼓而攻之可也.

Kwie sie hoe i tjoe kong. Dji kioe ja wie tji tjie
liam dji hoe ek tji. Tjoe wat. Hoei goh toh ja.
Siaoh tjoe beng koh dji kong tji kho ja.

Artin ja:

Satoe familie besar, Kwie Sie, jang berpangkat sebagai
大夫—Ta ij Hoe dari negri 魯—Loh, ada mempoenjai
kekajahan jang melebiken kabeşarannja dari kekajahannja prins
周公—Tjoe Kong. Sedeng begitoe, 冉求—Djiam Kioe,
jaitoe satoe moerid dari Nabi kita jang ada bekerdja pada
itoe ambtenaar, telah berlakoe begitoe tida meliat glagat dan

boekan berdaja boeat meringanken tanggoengannja rajat negri, malah sebaliknya ia soeda tambaken poengoetan dari roepa-roepa padjek, saolah-olah ia maoe teroes bikin kekajahan dari madjikannja djadi lebi besar kendatipoen bersifat tida adil.

Tatkala daptet taoe itoe perboeatan, Nabi kita laloe menggroetoe di hadepan moeridnya jang lain-lain begini:

Ketahoeilah olehmoe sekalian bahoea Djiam Kioe poenja perboeatan ada bertentangan dengan haloean dari pladjaran kebatinankoe. Dengan begitoe, djadi ia sebagi boekan soeatoe moerid jang menerima akoe poenja pladjaran. Kau orang, moerid-moeridkoe, ada mempoenjai kewadjiban sebagi kawan dari Djiam Kioe, maka patoetlah kaloe rame-rame kau pergi kasi nasehat padanja, biar ia bisa perbaiki kelakoeannja jang njasar.

柴也愚，參也魯，師也辟。由也彥。

Tjhajj ja gi. Tjham ja loh. Soe ja phek. Joe ja gaan.

A r t i n j a :

Sasoeatoe orang jang bladjar oemoemnja ada mempoenjai tjatjat-tjatjat jang berbedahan satoe pada lain. Demikianpoen moerid-moerid dari Nabi Khongtjoe, jang goeroenja bisa menjatet antaranja ada ampat jang mempoenjai tjatjat masing-masing sebagi berikoet:

Moerid Tjhajj, alias 子羔—Tjoe Ko, katjerdikannja ada koerang tjoekoep hingga tabeatenja koekoeh pada barang jang soeda biasa, lantaran apa ia djadi bertjatjat bodo;

Moerid Tjham, jaitoe 曾子—Tjeng Tjoe, tabeatenja saderhana hingga saben melakoeken sasoeatoe oeroesan ada lambat, tida bisa sebat, lantaran apa ia djadi bertjatjat toempoel.

Moerid Soe, atawa 子張—Tjoe Tiang, ada gemarin sama kebagoesan hingga perboeatan-perboeatanja djarang jang dengan sasoenggoenja, lantaran apa ia djadi bertjatjat njerong, dan

Moerid 仲由—Tiong Joe, atawa 子路—Tjoe Louw, berprangi keboeroe-nafsoe dan zonder maoe meliat haloean, lantaran apa ia djadi bertjatjat kasar.

子曰。回也其庶乎屢空。

Tjoe wat. Hwe ja ki sie houw li khong.

A r t i n j a :

Goeroe kita ada berkata:

Moerid 顏回—Gan Hwe telah dekat aken bisa sampe pada ilmoe sedjati dan ia ada begitoe giat dalem bladjar pengatahoean batin, hingga kendati saben-saben moesti terantjem oleh bahaja kakoerangan tapi itoe halangan kamiskinan tida bisa mehindis ia-poenja ingetan jang soetji boeat djadi tergojang.

賜不受命而貨殖焉。億則屢中。

Soe poet sioe beeng. Djii hoh^a sit jan. Ik tjek li tions.

A r t i n j a :

Kelakoean dari moerid Soe, alias 子貢—Tjoe Khong, ada sebaliknya dari Gan Hwe. Ia tida maoe pasrah pada takdir hanja ia paksa maoe dapatken hatsil kekajahan. Beroentoeng, maski ia-poenja kelakoean ada tjara memaksa, tapi kerna ia ada mempoenjai tjoekoep katjerdikan dan katadjeman, hingga ia-poenja taksiran-taksiran seringkali ada kabetqelan.

子張問善人之道。子曰 不踐迹，亦不入於室。

Tjoe tiang boen siaan djin tji too. Tjoe wat.

Poet tjian tjek. Ik poet djip i sit.

A r t i n j a :

Moerid Tjoe Tiang ada bikin pertanja'an pada goeroenja, bahoea bagimanatah keada'nnja itoe orang jang diseboet saorang baik ?

Nabi kita mendjawab: Orang baik adalah itoe orang jang batinnja berdasar baik, maka kendati tida bladjar aken mengetahoei perdjalananja Nabi-nabi ia tida aken kadjeblus pada perboeatan-perboeatan jang djahat. Tapi, maskipoen demikian adanja, kerna tida bladjar nistjaia djoega ia djadi tida aken bisa toeroet pada perdjalananja Nabi-nabi jang aloes dan oetama.

子曰、論篤是與、君子者乎、色莊者乎。

Tjoe wat. Loen tok sie i. Koen tjoe tja houw. Sek tjang tja houw.

A r t i n j a :

Nabi kita berkata:

Dalem hendak menjataken sasoeatoe orang ada beroepa Koentjoe atawa boekan, tida boleh meloeloe tjoema menilik sadja dari ia-poenja omong-omongan apakah ada mantep dan tetes lantas soeda maoe di anggep benar. Hanja, koedoe dinjataken lebi djaoe apakah sabetoelnja antara lahir dan batinnja ada saroepa baikna, dan apakah itoe kebagoesan tida tjoema ada soeatoe poelasan dilahir sadja ?

子路問聞斯行諸、子曰、有父兄在、

如之何其聞斯行之。冉有問聞斯行諸。

子曰、聞斯行之。公西華曰、由也問聞斯行諸。子曰、有父兄在。求也問聞斯行諸。子曰、聞斯行之，赤也惑。敢問，子曰、求也退故進之。由也兼人故退之。

Tjoe louw boen boen soe heng tjoe. Tjoe wat. Joe hoe heng tjaïj. Djii tji ho ki boen soe heng tji. Djiam joe boen boen soe heng tjoe. Tjoe wat. Boen soe heng tji. Kong se hoa wat. Joe ja boen boen soe heng tjoe. Tjoe wat joe hoe heng tjaïj. Kioe ja boen boen soe heng tjoe. Tjoe wat boen soe heng tji. Tjhek ja hek. Kam boen. Tjoe wat. Kioe ja thwee kouw tjien tji. Joe ja kiam djin kouw thwee tji.

A r t i n j a :

Moerid Tjoe Louw perna mananj pada goeroe kita, seande sasoeatoe orang ada mendenger soeatoe perkara kebaikan apatah moesti lantas dilakoeken? Nabi kita mendjawab: Memang djoega apabila ada soeatoe perkara jang baik koedoe dilakoeken, tapi djika masih ada poenja orang-toewa atawa familie jang lebi toewahan lebi doeloe haroes pergi berempoek padanja, bahoea bagimanatah ia-poenja pendapetan kaloe itoe perkara ia lakoeken.

Moerid Djiam Joe poen perna mananja goeroe kita poenja pikiran dalem soewal jang sama dengen apa jang telah ditanjaken oleh colleganja terseboet, tapi oleh Nabi kita telah didjawab lain, jaitoe: Djikaloe mendapat taoe soeatoe kewadjiban jang pantes dan tida maoe melakoeken ia boekan ada itoe orang jang gaga, maka apabila dapet denger soeatoe perkara jang baik memanglah moestinja lantas dilakoeken.

Kamoedian moerid Kong Se Hoa merasa tida maoe mengerti sama katrangannja Nabi kita ini, jang ternjata bahoea boeat satoe roepa pertanja'an ia soeda kasi pendjawaban jang berbeda satoe, antara lain, lantaran apa ia djadi berkata pada goeroenja:

Sedeng boeat Tjoe Louw poenja pertanja'an, apakah ia moesti lantas lakoeken kapan dapet soeatoe perkara jang baik, didjawab: koedoe berempoek doeloe pada orang-toewa, kenapatah djoega boeat pertanja'nnja moerid Djiam Joe, jang saroepa itoe, Hoetjoe djawab: koedoe lantas dilakoeken? Itoe ada membikin Tjhek-Kong Se Hoa basain dirinja—merasa sangsi dan braniken hati madjoeken ini pertanja'an.

Nabi kita kasi katrangan begini:

Akoe mengadjar Djiam Joe dan Tjoe Louw kaloe pake itoe perbedahan djawaban adalah akoe mengikoeti masing-masing tabeatinja jang ada berlainan. Djiam Joe pranginja ada lemah dan bisa membawa kamoendoeran, maka akoe kasi nasehat biar ia bisa berlakoe sebat. Sebaliknya, moerid Tjoe Louw poenja tabeat ada keras dan tida maoe kala sama orang lain, lantaran apa maka akoe bikin sabar, aken soepaia ia bisa berlakoe lebi ati-ati dalem perboeatan-perboeatannja.

子畏於匡，顏淵後。子曰。吾以汝爲死矣，曰。子在匡何敢死。

Tjoe wie i khong. Gan jan houw. Tjoe wat. Goh i dji wi soe ie. Wat. Tjoe tajj hwe ho kam soe.

Artinjaa:

Tatkala Nabi kita soeatoe hari telah dikepoeng oleh penedoek dari bilangan Khong, moerid Gan Jan itoe waktoe djadi terpentjar dari goeroenja dan kamoedian sasoedanja itoe kepoengan boebar baroelah ia bisa bertemoe poela pada itoe goeroe, jaitoe Nabi Khong tjoe.

Nabi kita laloe berkata padanja: Akoe kira, kau telah djadi korbanja sendjata dari orang Khong lantaran akoe poenja oeroesan ini.

Gan Jan mendjawab: Sabegitoe djaoe goeroekoe masih berada didalem kaslametan, masatah akoe brani sembarang korbanken djiwakoe.

Katrangan:

Dengen mendjawab sademikian moerid Gan Hwe bermaksoed bahoea djikaloet moestinja, jaitoe seande itoe waktoe goeroenja berada didalem bahaja, tentoelah ia moesti madjoe membellaah kendatipoen boeat itoe pembellahan ia koedoe

korbanken djiwanya, tapi kerna sang goeroe berada didalem slamet maka kenapatah djoega ia tida merasa sajang pada djiwanja aken dikorbanken pada sendjatanja itoe orang dari bilangan Khong. Disini bisa diliat betapa besar adanja katjinta'an dari antara itoe kadoea goeroe dengen moeridnya, jang mana saolah-clah maoe menjaga biarlah antara idoep dengen mati bisa bersama-sama, soeatce katjinta'an jang tida boleh dipersamaken dengen katjinta'annya sasoeatoe goeroe dengen moeridnya jang lain-lain.

**季子然問仲由冉求可謂大臣與。
子曰。吾以子爲異之間。曾由與求之間**

Kwie tjoe djian boen tiong joe djiam kioe kho wie taij sin i. Tjoe wat. Goh i tjoe wi ihⁿ tji boen. Tjeng joe i kioe tji boen.

Artinjaa:

Kwie Tjoe Djian ada itoe orang jang soeka ngebangga sama kepangkatannja, maka satelah ia bisa memake pada moerid Tiong Joe dan Djiam Kioe sebagai penggawe lantaslah ia madjoeken pertanja'an pada Nabi kita bahoea apakah ketjakepanna itoe doea penggawe, Tiong Joe dan Djiam Kioe, boleh dipandang sebagai itoe ambtenaar-ambtenaar besar?

Nabi kita mendjawab: Akoe kira jang kau hendak tanjaken halnja orang-orang jang loear biasa kepandeannja, tida taoenja kau tjoema menanja prihal kadoea moerid Tiong Joe dan Djiam Kioe.

所謂大臣者，以道事君，不可則止。

Se wie taij sin tjia. I too soe koen. Poet kho tjeck tji.

Artinjaa:

Jang diseboet soeatoe ambtenaar besar boekanlah meloeloe maoe ditilik tentang nama dan pangkatnya sadja, hanja djoega koedoe dipandang dari ia-poenja tjara berlakoe, jang haroes menjaga pada radjanja dengen menggoenaken sikep jang djedjak

dan tida main mengikoet sadja pada radjanja poenja nafsoe jang tersesat boeat mengambil hati dan soepaia disoeka olehnya. Djikaloe ia-poenja haloean jang baik tida bisa ditoeroet ia lebi soeka oendoerken diri dari pangkatnja dari pada moesti menjimpang dari kabeneran, jang mana bisa menjemarken dirinja; demikianlah Nabi kita kasi katrangan.

今由與求也，可謂具臣矣。

Kim joe i kioe ja. Kho wie kie sin ie.

Artin ja:

Nabi kita berkata lebi djaoe:

Keadaannja moerid Tiong Joe dan Djiam Kioe belon taoe apakah marika bisa ambil itoe kelakoean dari soeatoe ambtenaar besar, jaitoe: mendjaga radja dengan menggoenaken sikep jang djedjak dan djika ia-poenja haloean jang baik tida terkaboel lebi soeka oendoerken diri; maka, boeat sekarang marika tjoema baroe boleh diseboet ada itoe ambtenaar sakedar aken membuat lengkap tempatnja ambtenaar jang kosong.

曰。然則從之者與。子曰。弑父與君亦不從也。

Wat. Djian tjeck tjiong tji tjia i. Tjoe wat.

Sie hoe i koen ek poet tjiong ja.

Artin ja:

Kwie Tjoe Djian belon insjaf sama orang poenja sindiran maka ia laloe menanja lebi djaoe: Djika demikian adanja, boekankah djadi Tiong Joe dan Djiam Kioe melingken main mengekor sadja?

Nabi kita mendjawab sambil katanja: Tida, kendati marika belon bisa berlakoe sebagai adanja soeatoe ambtenaar besar, tapi kerna marika boleh dikata telah tjoekoep kenjang mendenger pladjaran tentang kewadjiban antara soeatoe kepala dengan pembawahnja, maka apabila boeat sasoeatoe hal jang sanget tida beratoeran, seperti marika diprenta moesti boenoeh ajah atawa radja, pastilah marika tida nanti soeka menoeroet.

禮之要

LE TJI JA UW.

Kapentingannja adat-kasopanan.

Adat-kasopanan, 禮—Le, boekan ada satoe soewal jang baroe terkenal oleh manoesia di doenia, hanja ia soeda digoenaken di seloeroe alam sadiek berabad-abad jang telah laloe.

Sabenarnja, pokok dari adat-kasopanan dimanatah adanja? Boekan ditempat lain, hanja berada didalem batin manoesia sendiri, maka dibilang: 禮在人心中—Let ja ij dji n sim tio ng.

Kaloewasannja adat-kasopanan apabila didjaga dengan sagenap hati 通乎天. 徹乎地. 格乎鬼神而不違. 維乎風教而不違—Thong houw thian. Thiat houw tee. Kek houw kwis in dji poet wi. Wi houw hong kauw dji poet tjhian = saolah-olah bisa menemboes langit dan menoblos boemi, bisa bikin tergerak roh-roh soetji hingga tida bisa terpisah dan bisa mengikat sasoeatoe kasopanan hingga tida bisa beroba.

Bagi kebatinan dari manoesia, maoepoen oentoek kasopanan oemoem, adat-kasopanan ada membawa kefaedahan besar sekali, maka pribasa-pribasa ada membilang:

禮在乎心，則心之妄念者退—Let ja ij houw sim, tjeck sim tji bong liaam tjaath wee, artin ja: adat-kasopanan djika ditaro pada batin, itoe ingetan-ingetan jang tersesat bakal djadi moendoer;

禮在乎視，則目之邪斂者亡—Let ja ij houw sie, tjeck bok tji sia siat tja bong, artin ja: adat-kasopanan djika ditaro pada pemandangan, itoe pengliatan-pengliatan jang haram aken djadi linjap;

禮在乎聽，則耳之外緣者息—Le tja ij houw theeng, tje k dji tji gwee jan tja sit, artinja: adat-kasopanan djika ditaro pada pendengeran, koeping poenja rasa kapintjoek oleh soewara-soewara jang tengik bisa djadi brenti;

禮在乎言，則口之輕浮者絕—Le tja ij houw gan, tje k khoh tji kheng hoe tja tjoat, artinja: adat-kasopanan djika ditaro pada peromongan, moeloet poenja mengobrol bisa tertjega, dan

禮在乎動，則身之放蕩者歟—Le tja ij houw tong, tje k sin tji hong tong tja liam, artinja: adat-kasopanan djika ditaro pada gerakan, itoe tingka-lakoe jang oegalan nistjaia bisa tersingkir.

Antara pladjaran-pladjarannja Nabi Khongtjoe poen ada mengoetamaken prihal adat-kasopanan, jang mana bisa diliat dari ia-poenja oedjar jang membilang:

非禮勿視。非禮勿聽。非禮勿言。非禮勿動—Hoei le boet sie. Hoei le boet theeng. Hoei le boet gan. Hoei le boet tong = Djangan memandang soeatoe apa jang djadi melanggar pada adat-kasopanan, djangan mendenger soeatoe apa jang djadi melanggar pada adat-kasopanan, djangan mengomongken soeatoe apa jang djadi melanggar adat-kasopanan dan djangan bergerak soeatoe apa jang djadi melanggar pada adat-kasopanan.

Nabi kita, kaloe kasi nasehat begitoe pada oematnja, kerna ia mengetahoei bahoea itoe gerak-gerakan manoesia di lahir jang njasar sabenarnja ada mengikoeti pada batinnja jang lebi doeloe memang soeda tida lempang lagi dan djikaloe batinnja memang soeda tida lempang gerak-gerakannja di lahir, biar bagimana djoega, soekerlah aken bisa diharep baiknja. Lantaran demikian, maka manoesia dipladjarin biar didik betoel-betoel batinnja dengan kakoeatan perasahan adat-kasopanan, sebab djika batinnja

soeda bresi dan soetji, segala gerak-gerakannja di lahir nanti mengikoet, dan zonder tjara paksa'an en toch semoea tida aken kaloeear dari kalangan adat-kasopanan.

Adat-kasopanan djoega ada memegang rol penting oentoek pri-kasopanan hingga dalem pergaoelan bangsa sopan tida boleh tida adat-kasopanan ada menjelak disitoe. Kaloe adat-kasopanan soeda tertanem di batin segala oeroesan aken menjadi sampoerna dan adil, dan perhoeboengan pergaoelan menjadi baik. Sebaliknya, djika batin manoesia tida ada mengandoeng perasahan adat-kasopanan boekan sadja marika poenja perboeatan-perboeatan bakal tida bisa djadi benar dan adil, hanja pri-kemanoesia'an poen bakal djadi antjoer.

Demikianlah, maka soewal adat-kasopanan ada diartiken lebih dalem dengan perkata'an: 禮者天理之節文也—Le tja i thian li tji tjiat boen ja, = Adat-kasopanan ada menjadi kiasan dan garis-garisannya wet alam, atawa wet Toehan.

Tjara bagimana aken manoesia bisa menanem adat-kasopanan di batinnja ada dioendjoek djalan begini: Pertama: 潤其心志—Thek ki sim tji e = Bresiken boedi-pakertinja, kadoea: 固其神明—Kouw ki sin beng = Tegoeken soemangetnja dan katiga: 束其性情—Sok ki seeng tjeng = Ikat pri-kenafsoeannja. Djikaloe boedi-pakertiannja soeda djadi bresi ingetannja tentoe aken djadi terang dan toedjoeannja bakal tetep serta kekal dⁿ bakal mendjoeroes pada kebaikan, lantaran apa, achirnja sampelah pada 至善之地—Tjie siaan tji tee = pokonja kebaikan jang sedjati, dimana ada terletak 禮之本也—Le tji poen ja = poko dari adat-kasopanan, atawa wet Toehan.

Oemoemnja kebanjakan manoesia kena seret oleh desekannja: 驕奢勢威, 滅乎禮而不知非—Kiaoh tjhia sie wi. Biathouw le dji poet ti hoei = lakoe jang angkoeh, sompong-sombongan, mengandelken pengaroe dan membanggaken

kakoewasa'annja, jang mana kendatipoen sasoenggoenja bisa meroesak pada adat-kasopanan dan pri-kepantesan tapi marika toch tida mendoesin bahoea itoe ada perboeatan jang tersesat; 鄙淫. 違乎禮而不知改—Hong phek sia im. Wi houw le dji poet ti kaij=oegal-oegalan, kepala batoe, berlakoe serong dan hina, jang mana kendatipoen itoe semoea ada melanggar adat-kasopanan tapi marika toch tida bisa mendoesin aken meroba, dan begitoelah, hingga kasedjatiannja adat-kasopanan djadi roesak, sampe 禮祭婚姻. 不務乎禮之實—Song tjee hoen in. Poet boe houw le tji sit=platoeran platoeran kematian, semabajangan dan platoeran pernikahan semoea tida memperhatiken kasedjatiannja adat-kasopanan.

Dalem pengidoepan dan pergaoelan manoesia tida boleh meninggalken pada Le, sebab:

Djika didalem sasoeatoe roema-tangga tida berlakoe Le, disitoe tida aken mendapet kaberesan;

Djika didalem kalangan sasoeatoe familie tida digoenaaken Le, disitoe bakal timboel perkara saling tjakar;

Djika pada dirinja sasoeatoe orang tida ada terdapet Le, ia tentoe dapet hina'an sebagai keada'annja binatang, dan

Djika sasoeatoe ambtenaar tida memake Le, pembawahan-pembawahnja nanti tida soeka bertoendoek dengan sagenep hati.

Lantaran itoe semoea, maka djoega ada dibilang: 有禮則安無禮則危—Joe le tjek an. Boe le tjek goei, artinja: Dalem segala apa djika disitoe ada terdapet kasedjatiannja Le bakal menjadi slamet, atawa, djika berkeada'an sebaliknya ia aken bisa berbahaja. Samentara dalem pladjarannja Nabi-nabi poen ada dioetamaken prihal 禮教—Le Kauw, atawa pladjaran adat, dengan apa dimaksoedken aken soepaia manoesia bisa beridoep dengan sampoerna hingga keada'an doenia bisa ketarik toeroet djadi aman.

Kasedjatiannja adat-kasopanan dengen manoesia ada sebagai itoe arak dengen raginja. Pada sasoeatoe Koentjo e ada ter-tjampoer banjak, sebaliknya sasoeatoe Siaohdjin ada tipisan.

Nabi Khongtjo e ada membitjaraken dalem kitab 禮運—Le Oen begini:

Sekalian Nabi-nabi, aken goena menjampoernaken manoesia poenja pengrasahan, marika perbaiki pokonja pri-kepantesan dan mengatoer rantakannja Le. Itoe pengrasahan - manoesia ada ibarat radja-radja soetji poenja tana-sawa.

Boeat mengoesahken itoe tana-sawa djadi digoenaaken atoeran-atoeran begini:

脩禮以耕之—Sioe le i keng tji = Dilokoe dengan menggoenaken prabot adat-kasopanan;

陳義以種之—Ting ie i tji ong tji = Ditanemi bibit dengan menggoenaken penjelidikan soewal kepantesan;

講學以耨之—Kang hak i touw tji = Didaoet, jaitoe disingkirken kakotorannja, dengan djalan memperhatiken pladjaran-pladjaran;

本仁以聚之—Poendjin i tji e tji = Dikoempoelin hasilnja dengan berpoko kasoetjian, dan

播樂以安之—Poo gak-i an tji = Dibikin antang dengan andjoerannja sikep jang akoer.

Le ada mendjadi practijkna pri-kepantesan, maka sasoeatoe gerakan djika ditjotjokin dengan pri-kepantesan bisa akoer, ia boleh diartiken adat-kasopanan, dan kendati oleh radja-radja dari doeloe-kala itoe tjara-tjara belon ditjitak sebagai adat-istiadat, tapi ia bolehlah dilakoeken dengan bersender pada pri-kepantesan.

Pri-kepantesan ada mendjadi sila-silanja kepandean dan bates-batesannja pri-kasoetjian, maka djika pri-kepantesan di-akoerin sama ilmoe kepandean dan dilakoeken dengan sikep kasoetjian, pendapetannja tentoe tegoe.

Pri-kasoetjian ada mendjadi pokonja kepantesan dan dasarnja kesampoerna'an, maka siapa jang dapet melakoeken itoe ia aken djadi moelia.

Maka Le poenja perhoeboengan pada negri adalah:

Djika mengatoer negri tida menggoenaken tjita-tjitanja Le, ada sebagi orang menjawa jang tida mempoenjai prabot meloekoe;

Menggoenaken Le, tapi tida berpoko pada pri-kepantesan, ada sebagi orang meloekoe tapi tida ditanemin bibit;

Memake sikep kepantesan, tapi djika tida di-jakinken dengen pladjaran, ada sebagi sasoedanja orang tanem bibit lantas tida di-openin lebi djaoe, aken disingkirken kakotorannja;

Mejakinken pladjaran, tapi djika tida ditjotjoken pada pri-kasoetjian, ada sama sadja dengen satelah disingkirken kakotorannja tapi padinja tida diketam;

Biar telah tjotjok pada kasoetjian, tapi djika tida dibikin antang dengen keakoeran, ada sama sadja dengen orang sasoeda ketam padinja tapi hasilnya tida dimakan;

Dan, kendati soeda dibikin antang dengen keakoeran, tapi djika tida bisa melakoeken dengen sampoerna, ada sebagi orang makan tapi tida bisa djadi gemoek.

Kagemoekan jang diseboet disini ada mengandoeng banjak matjem fatsal, jaitoe:

Pertama: Anggota badan jang segar dan koelitnja penoe, itoelah ada manoesia poenja kagemoekan;

Kadoea: Antara ajah dan poetra saling menjinta, antara soedara-soedara akoer dan antara soeami istri bisa roekoен, ini ada mendjadi roema-tangga poenja kagemoekan;

Katiga: Ambtenaar-ambtenaar besar berlakoe menoeroet atoeran, samentara ambtenaar-ambtenaar jang ketjilan berhati bresi; pangkat-pangkat diatoer menoeroet rantakannja dan antara kepala dengen pembawahnja satoe sama lain soeka saling menasehatken

djika ada terbit pikiran-pikiran jang kliroe, ini ada kagemoekan-nya soeatoe negri;

Keampat: djika soeatoe keizer memandang pri-kabedijken sebagi ia-poenja kandaran dan memake sikep keakoeran boeat mengandarin; sekalian gouverneurs dalem pergaoelannja memperhatiken adat-kasopanan dan ambtenaar-ambtenaar jang sebawahan tingkat-tingkatannja diatoer menoeroet atoeran; sekalian sastrawan pada memperhatiken pri-kapertjaja'an dan semoea rajat pada memperhatiken pri-karempoekan, ini ada doenia poenja gemoek.

Dan, keada'an jang sademikian adalah itoe jang diseboet kesampoerna'an besar.

Itoe kesampoerna'an besar ada soeatoe soewal jang tetep dan penting bagi manoesia idoep teroes sampe pada mati, serta boeat menghormat sekalian roh-roh soetji.

Kesampoerna'an jang loewas ada mengandoeng banjak roepa kebaikan, antara mana adalah: Kendati banjak perkara-perkara besar sampe bertoempoek-toempoek semoea bakal teroeres dengen rapi dan tida sampe djadi basi; beberapa oeroesan kendati dikerdjaken barang tida sampe djadi tjampoer-adoek; mengoeroes sasoeatoe pakerdja'an dengen tjara plahan tapi tida sampe djadi kapiran; maski keada'nnja dalem tapi senantiasa ada temboesannja, dan kendati berlakoe memaksa tapi orang ada dikasi kasempetan boeat mengaso; kendati berentet-rentet tapi tida roewet dan maskipoen tergerak gerak tapi tida membahajken satoe pada lain.

Itoe semoea ada berarti kesampoerna'an jang loewas, maka siapa jang soeda mengarti baik fatsal kesampoerna'an jang loewas, baroelah ia bakal bisa mendjaga datengnya soewal-soewal jang berbahaja.

小學集解
SIAOH HAK TJIP KAY.
Peroendingan ringkes soewal
pladjaran renda.

Di lain-lain nomor soeda dimoeat pendapatan-pendapetannja bebrapa orang pande, tentang poedjonggo Tjo e Hi atau Tjo e Hoe Tjo e poenja rentjana pladjaran renda.

Dibawah ini adalah itoe rentjana sendiri dari Tjo e Hoe Tjo e, jaitoe platoeran pladjaran renda bagian 内篇—Lwee Phian, atawa bagian dalem.

Ini bagian ada mempoenjai ampat fatsal, jaitoe: 立教. 明倫. 敬身. 稽古—Lip kauw. Beng loen, Keeng sin. Ke koh = Menanam pengatahoean tentang kapentingannja pladjaran, menerangken soewal pri-kemoesia'an, mameladjarin soepaia manoesia memprihatin dirinja dan penjelidikan dari kedjadian-kedjadian djeman doeloekala.

Didalem fatsal jang pertama, jaitoe: 立教—Lip Kauw, ada memoewat rentjana-rentjana sebagi berikoet dibawah ini. Ini fatsal pertama maski tjoema mempoenjai rantakan sedikit sadja, tapi sabenarnja ia ada sebagi poesat dari sarinja itoe satoe stel kitab pladjaran renda.

Itoe rentjana-rentjana ada begini:

Dalem kitab Tiong Jong, tjoetjoek dari Nabi Khong-tjo e, jaitoe 子思—Tjo e Soe, ada mengoelang: 天命之謂性. 率性之謂道. 倚道之謂教—Thian beeng tji wie seeng. Soet seeng tji wie too. Sioe too tji wie kauw=Firman Toehan jang teramat soetji dan jang dikoerniaken pada manoesia aken didjadiken poko dari

kebatinan, adalah itoe jang diseboet Seeng; jang manoesia toentoet itoe poko kebatinan dengen sampoerna, itoelah diseboet Too, dan jang manoesia bisa perbaiki itoe, atawa menjiarken itoe platoeran-platoeran dari wet Toehan pada sesamanja, dinamaken Kauw. Dengen ini oedjar ada dimaksoedken bahoea manoesia haroes bisa mamegang tegoeh 天之明命—Thian tji beng beeng=Thian poenja firman jang moelia, jaitoe 仁義禮智之理—Djin gie le tie tji li=kasedjatiannja boedi tjinta-kaseh, boedi kabenario, boedi kasopanan dan boedi keawasan, jang mana Thian koedradken pada sekalian manoesia sebagi poko kebatinan, dan boeat bisa begitoe manoesia haroes berlakoe 循聖人之法—Soen seeng djin tji hwat=menoentoet atoeran pladjarannja Nabi-nabi, kerna pladjaran dari Nabi-nabi ada berpoko sampoernaken berlakoenja wet-wet Toehan, jaitoe Thian beeng tji seeng, atawa poko kebatinan sedjati jang Thian koerniaken pada sekalian manoesia.

Dengan dikoetibnja itoe oedjar dari kitab Tiong Jong terseboet diatas ada selakoe aken menerangken bahoea poko dari pladjaran kebatinan tida ada menggoenaken paksa'an, hanja sakedar tjoema mengambil djalan dari apa jang manoesia sa-soenggoenja memang soeda ada mengandoeng, jaitoe poko kebatinan, jang mana disampoernaken tjara-tjaranja aken soepaia boleh mendjadi prilakoe jang oetama oentoek manoesia didoenia selama-lamanja.

Sadjek djerman jang blakangan dari Wali Tjo e Soe dan Rasoel Beeng Tjo e pladjaran dari Nabi-nabi telah kapoetoesan orang jang menoeroenken, demikianlah sedari itoe waktoe orang-orang jang bladjar djadi masing-masing menoentoet pladjaran menoeroet poenja kasenangan sendiri, jaitoe: ada jang bladjar kasastrawan dan marika mengoetamaken sadja prihal

membatja dan mengarang, ada jang mengoetamaken pladjaran kaboeeddahan, ada jang memboeroe 管子—Kwan Tjo e dan 商子—Siang Tjo e poenja ilmoe-ilmoe hoekoem dan politiek, atawa lain-lain ilmoe poela jang bisa membawa pri-katjoepatan, sedeng pladjaran-pladjaran Nabi jang berpoko menjampoernaken kebatinan tida terkenal poela ada sebagai soeatoe benda jang matjem bagimana, lantaran apa hingga itoe orang-orang jang bladjar biarpoen dengen sanget ngotot boeat bisa dapet banjak pengatahoean dan pendengeran, tapi kerna marika bladjar sakenanja sadja achirnya toch marika tida bisa dapetken itoe Nabi-nabi poenja pladjaran tentang ilmoe kebatinan.

Demikianlah, maka Tjo e Hoe Tjo e 述此篇. 備爲師者知所以教. 而弟子知所以學—Soet tjhoe phian. Pie wi soet tjia ti se i kauw. Dji tee tjoet i se i hak = menerangkan ini atoeran pladjaran renda bagian batin dengan maksoed soepaia sasoeatoe goeroe nanti bisa mengadjar dengan mamegang tegoeh pada firman dari Thian dan oedjar-oedjarnja Nabi hingga tida membikin kapiran pada moerid-moeridnja dan mroesakin manoesia poenja kabedijkan, atawa sebaliknya boeat sasoeatoe moerid biar marika nanti bladjar dengan mamegang tegoeh pada firman dari Thian dan oedjar-oedjarnja Nabi hingga djadi tida kesasar ka tempat jang tersesat dan tida sia-siaken tenaga jang digoenaken boeat bladjar.

Ini kitab pladjaran renda kendati dikarang boeat goenanja moerid-moerid, tapi bagi orang-orang jang menjadi goeroe semoea haroes djoega koedoe memahamken sampe matang dan jakinken betoel-betoel, kerna dengen zonder memperhatiken ini kitab soekerlah aken orang maoe mengetahoei baik tjara-tjaranja mengadjar jang sedjati.

Boekoe hikajat 列女傳—Li at Li Twa an ada moeat tjita-tjitanja orang bikin pendjaga'an bagi prempoean jang sedeng hamil, jang mana boeninja ada sebagai berikoet:

Prempean-prempoean dari djeman doeloekala, djika pada masanja lagi hamil senantiasa mendjaga dirinja dengan lakoe antara lain-lain, begini:

寢不測—Tjh im poet tj hek = kaloe berbaring toe-boenja tida dimiringin, 坐不邊—Tjoo poet pian = djika doedoek tida ambil tempat minggir, 立不蹕—Lip poet pit = didalem berdiri tida menahan badannja dengen kaki sasisi, 不食邪味—Poet sit sia bie = tida dahar barang santapan sembarang-barang, 割不正不食—Kat poet tjeeng poet sit = daging jang dipotong-potong sembarang tida maoe makan, 席不正不坐—Sek poet tjeeng poet tjo o = tiker jang dibeber dengen tjara tida perna tida maoe doedoekin, 目不視邪色—Bok poet sie sia sek = tida soeka meliat barang jang tida keroeanan, dan 耳不聽淫聲—Dji poet theeng im seng = tida soeka mendengerin soeara jang tida pantes. Djika hari soeda djadi petang sengadja oendang orang disoeroe batjaken boekoe-boekoe jang baik dan disoeroe mengomongin hal-hal jang penting.

Dengen dilakoeken pendjaga'an tjara begini ada banjak harepan bahoea itoe anak jang dikandoeng nanti terahir dengen roman jang terang dan djedjak, maoepoen kepandeannja bakal tida kala pada sesamanja.

Inilah ada pladjaran soewal mendjaga boentingan.

Poedjongan Tjoetjoe poenja rentjana pladjaran kaloe ambil ini djalan didjadiken soewal jang pertama-tama dari lantaran prempean jang sedeng hamil ada sanget penting sekali koedoe didjaga

segala pengrasahan jang bisa menarik pikirannya. 善於善則善。感於惡則惡—Kam i siaan tjek siaan. Kami ok tjek ok—Djika ketarik oleh perkara jang baik ia akan mengasi kebaikan, sebaliknya djika ketarik oleh perkara jang boesoek ia poen bakal membawa kadjelekan.

Terdjadi dan idoepnja segala benda di doenia semoea ada dari tenaganja 太極—Tha ij Kek poenja positief dan negatief bersama kalima matjem hawa (The five elements), jaitoe hawa metaal, kajoe, aer, api dan hawa tana. Begitoepen manoesia djadi terlahir djika wet Allah djadi tjotjok dengen hawa. 具是理則爲健順五常之性。稟是氣則爲魂魄五藏之形—Kie sie li tjek wi kiaan soen ngoh siang tji seeng. Pin sie khie tjek wi hoen phek ngoh tjong tji heng—Dengan kakoeasahannja itoe wet Toehan, manoesia djadi ada poenja watek keras dan lemah serta itoe kalima priboedi jaitoe 仁義禮智信—Djin gie le tie sien, dan atas tenaganja itoe hawalah jang telah mendjadiken manoesia poenja woedjoed, seperti djiwa dan raga bersama saisi peroetnja.

Djika maoe dibitjaraken prihal manoesia poenja watek jang aseli, jang dari Thian, jaitoe Thian beeng tji seeng, semoea ada oetoe dan sanget baik, serta satoe antara jang lain tida ada bedanja. Tapi, bagi itoe pesawat jang terdapat atas dasarnya hawa, jaitoe Khie tjit tji seeng, tentoe sadja tida bisa tida ada perbedahan dari antara bresi dan kotor, atawa bagoes dan djelek. Jang bresi dan bagoes bakal membawa katjerdikan dan kapinteran, sedeng sebaliknya jang kotor dan djelek bakal membawa kabebalan dan kabodoan.

Demikianlah, maka waktoe prempoean mengandoeng hamilan segala perasahan jang menarik pikirannya, biar dalem masa lagi berbaring, lagi berdoedoek, lagi berdiri, lagi meliat dan lagi mendengerin apa-apa, semoea itoe ada 清濁美惡之機括。智愚賢否之根柢也—Tjheng tok bi ok tji ki kwat. Tie gi hian hoh tji kin ti ja—pesawat mengoedji dari kabresian, kakotoran, kabagoesan dan kadjelekan, jang achirnya akan mengasi kasoedahan: tjeridik, bebal, pinter atawa bodo.

Anak jang lagi didalem kandoetan iboenja dalem hal melepas dan menarik napas ada mengikoet pada si iboe poenja melepas dan menarik napas, maka djika si iboe isep oedara jang segar dan baik itoe poen akan didapet djoega oleh si anak jang didalem kandoetan. Lantaran itoe, maka sasoeatoe prempoean jang lagi berhamil dalem segala waktoe tida boleh tida mendjaga dengen ati-ati, soepaia semoea perboeatannja bisa mendjadi benar, biar segala apa jang tida baik tida bisa masoek di batin dan dengen demikian mendjadi itoe anak jang terkandoeng bakal mendapat dasar jang sampoerna dan menerima apa jang ditjiptaken oleh Natuur dengen oetoe.

Inilah ada 立教之本原—Lip kauw tji poen goan—poko-dasar atawa principe dari menanam pladjaran, maka ia ditaro pada bagian jang pertama-tama.

(Aken disamboeng).

中庸
TJONG JONG.
Kitab Tiong Jong.

中庸第三十二章。

Tiong Jong Tee Sam Sip Djie Tjiang.

Artin ja:

Kitab Tiong Jong hoofdstuk 32.

唯天下至誠。爲能經綸天下之大經。
立天下之大本。知天地之化育。
夫焉有所倚。肫肫其仁。淵淵其淵。
浩浩其天。苟不固聰明聖知。
達天德者。其孰能知之。

Wi thian heh tjie seng. Wi leng keng loen thian heh tji taij keng;
Lip thian heh tji taij poen. Ti thian tee tji hwaa jok.
Hoe jan joe se i. Toen toen ki djin. Jan jan ki jan.
Hoo hoo ki thian. Koh poet kouw tjhong beng seeng tie.
Tat thian tek tja. Ki siok leng ti tji.

Artin ja:

Melingken saorang jang kaestoeannja sebagai Nabi kita baroe bisa mengatoer dengen sampoerna doenia poenja tata-rama, jaitoe 人倫—Djin Loen (Relation) jang terpenting; menetepken doenia poenja pokok kebatinan jang terbesar, dan lantaran ia-poenja kasoejian ada begitoe tinggi sebagai katinggiannja kasoejian dari alam, pada siapa segala machloek ada bergantoeng takdirnya, hingga ia poen ada mengetahoei baik tentang kedjadian dan idoepnja sekalian benda-benda.

Ini semoea ada dari sebab kaestoeannja Nabi kita jang begitoe moeloes dan tida barang sedikit djoewa poen ada tertjampoer oleh kepalsoean hingga bisa terjadi demikian roepa, maka masatah ada perloenza aken mengandel boeat minta bantoeannja apa-apa lagi.

Nabi kita poenja kasoetjian ada begitoe soenggoe, pokok kebatinannja begitoe dalem dan pengatahoeannja begitoe loewas. Djika boekan ada itoe orang jang sasoenggoenja mempoenjai dasar ketadjeman jang amat terang hingga mengarti baik adanja kabedjikan jang dari Thian, jaitoe kealoesannja Djin gie le tie, manatah bisa mengetahoei kaloewasannja koedrat Toehan.

中庸第三十三章。

Tiong Jong Tee Sam Sip Sam Tjiang.

Artin ja:

Kitab Tiong Jong hoofdstuk 33.

詩曰。衣錦尚絅。惡其文之著也。
故君子之道。闇然而日章。小人之道。
的然而日亡。君子之道淡而不厭。
簡而文。溫而理。知遠之近。知風之自
知微之顯。可以入德矣。

Si wat. Ie kim siaang keng. Ouw ki boen tji tie ja.
Kouw koen tjoe tji too. Am djian dji djit tjiang. Siaoh djin tji too.
Tek djian dji djit bong. Koen tjoe tji too taam dji poet jaam.
Kan dji boen. Oen dji li. Ti wan tji kien. Ti hong tji tjoe.

Ti bi tji hian. Kho i djip tek ie.

Artin ja:

Bagian sebla atas tadi Tjoe Soe telah meriwajatken tentang kaloewasannja kaestoean dari Nabi kita jang sebanding dengan kasoetjiannja Thian. Boeat soepaia orang-orang jang

aken bladjar ilmoe kebatinan djangan djadi kliroe aken boeroe-
boeroe lantas mengambil sadja bagian jang tinggi, dan soepaia
marika dapet mengetahoei bagimana tjaranja aken bladjar boeat
 bisa sampe di itoe tempat, jang lebi doeloe sabenarnja koedoe
di-moelai dari bagian jang sebla bawah, maka ia telah koetib
loekisan jang terdapat dalem kitab sair begini:

Ada itoe orang, jang apabila memake pakean dari soelaman
jang bagoes di sebla loewarnja di alesin dengan rangkepan
jang saderhana.

Ini oedjar aken dimaksoedken bahoea jang memake itoe
pakean tida senang sama adanja itoe kamenterengan jang dioen-
djoeken pada orang banjak. Tjara begini ada tjetjok sama
kelakoeannja sasoeatoe Koentjoe, jang senantiasa lebi per-
loeken membikin soepaia dirinja berkeada'an sampoerna dari
pada kasi orang taoe bahoea ia-poenja diri ada sampoerna.

Demikianlah, maka tjara berlakoenja sasoeatoe Koentjoe
awal-moelanja ketampak seperti barang jang terales, tapi semangkin
lama kasedjatian dari kebaikannja djadi semangkin njata. Bagi
sasoeatoe Siaoh djin ada sebaliknya, jaitoe pada bermolanja-
sadja ia sengadja kasi orang-orang liat kasombongannja, tapi
didalemna sabenarnja kosong blaka, hingga tamba lama tamba
tida bisa berkoetik.

Mendjadi, keada'nnja sasoeatoe Koentjoe, maskipoen
pembitjara'an dan perboeatannja ada saderhana, tapi didalemna
ada mengandoeng arti, hingga tida membosenken; keliatan tida
mentjorot tapi didalemna ada menggenggam penerangan jang
bagoes; sabar dan perlahan tapi semoea ada dengan beratoeran
jang tetep.

Itoe semoea ada dari lantaran ia ada memake pok haloean:
selaloe lebi soeka menjampoernaken dirinja dari pada kasi orang
taoe bahoea dirinja ada sampoerna, dan dari sebab itoe djoega

maka ia djadi mengarti baik djalarinja haloean, jaitoe apa jang
mendjalar djaoe asalnja dari dekat, kelakoean jang tersesat
berasal dari batin jang sala dan itoe kaberoekan dibatin jang
samar bisa menemboes pada kelakoean jang berachir djadi
senjata-njatanja.

Manoesia djika soeda bisa mamegang pok haloean me-
njampoernaken dirinja dan ditamba dengan mengetahoei tjaranja
katiga fatsal diatas ini, ia aken djadi mengarti baik tentang
soewal berati-atinja mendjaga diri, hingga bolehlah diharep aken
achirnja ia bakal bisa sampe pada kabedjikannja Nabi-nabi.

詩云。潛雖伏矣。亦孔之昭，故君
子內省不疚，無惡於志，君子之所
不及也。其唯人之所不見乎。

Si in. Tjam soei hok ie. Ek khong tji tjaoh. Kouw koen
tjoe lwee seng poet kioe.. Boe ouw i tje. Koen tjoe tji se
poet kip ja. Ki wi djin tji se poet kiaan houw;

Artin ja:

Kitab sair 小雅—Siaoh Ngéh bagian 正月—Tjeng
Goat ada meloekis begini: Tergeraknya pikiran dari manoesia
kendati berada didalem batin hingga tersemboeni, tapi apa
jang ditdedjoeh, jaitoe boeat kebaikan atawa boeat kedjahatan,
sasoenggoenja ada tjoekoep terang aken diketahoei.

Demikianlah, maka dalem prilakoenja sasoeatoe Koentjoe
senantiasa mendjaga berati-ati, dan kendati boeat sasoeatoe hal
jang tjoema diketahoei oleh dirinja sendiri tapi ia selaloe selidiki
biar djangan sampe, maski barang sedikit sadja, ada terselip
kedjahatan, dengan apa mendjadi maski pada batinnja sendiri
poen tida òesah dapat maloe.

Mendjadi, apa jang dibilang soeatoe Koentjoe bisa mendjaga diri boekanlah meloeloe mendjaga prilakoenja jang bisa tertampak oleh orang banjak, hanja ia poen bisa mendjaga baik gerakan batinnja jang tida dapat terliat orang.

**詩云. 相在爾室. 尚不愧于屋漏.
故君子不動而敬. 不言而信**

Si in. Siaang tjaij dji sit. Siaang poet khwie i ok lauw.
Kouw koen tjoe poet tong dji keeng. Poet gan dji sien.

A r t i n j a:

Kitab sair 大雅—Ta ij Ng e h djoega ada meloekis sebagai berikoet:

Kendatipoen kau sedeng berada didalem roema sendiri jang sanget sepi, djagalah ati-ati prilakoemoe soepaia djangan dapat maloe dari itoe bajangan dari lobang jang berada di podjok- podjokan.

Dengen menginget begitoe djoega, maka sasoeatoe Koentjoe poenja prilakoe kendati badannja tida bergerak tapi senantiasa djaga- djaga biar dirinja tinggal berhormat dan kendati moeloetnia tida beromong tapi senantiasa djaga- djaga soepaia batinnja tinggal djoedjoer.

**詩曰. 奏假無言 時靡有爭 是故君子
不賞而民勸. 不怒而民威於鈇鉞.**

Si wat. Tjouw kek boe gan. Si bijoe tjeng. Sie kouw koen tjoe poet siang dji bin khwaan. Poet nouw dji bin wi i hoe wat.

A r t i n j a:

Kitab sair ada membilang:

Pada masa di gredja dibikin semabajangan, djika jang kepalaing itoe semabajangan telah madjoe bersoedjoed dengan

begitoe soenggoe- soenggoe dan tida berbitjara, itoe sekalian jang berhadir pada merasa toeroet ketarik hatinja hingga tida ada soeatoe koetikan jang bisa melanggar peradatan.

Ini keada'an ada mengasi peroepama'an bagi prilakoenja sasoeatoe Koentjoe jang bedjik, jaitoe dalem memimpin sesamanja, kendati ia tida ada djandijken bakal kasi gandjaran iji atawa itoe, tapi orang merasa trima ia-poenja boedi dan dengen sendirinja soeka toeroet berlakoe baik; sebaliknya, dalem melakoeken paprentahan pada sesamanja, kendati ia tida oendjoeken kemarahan, tapi orang merasa trima ia-poenja boedi dan takoet aken berboeat djahat, lebi takoet dari pada antjemanna sendjata jang tadjem.

**詩曰. 不顯惟德. 百辟具形之.
是故君子篤恭而天下平.**

Si wat. Poet hian wi tek. Pek phek ki heng tji.
Sie kouw koen tjoe tok kiong dji thian heh peng.

A r t i n j a:

Kitab sair ada meloekis:

Sasoeatoe keizer jang mamegang kabedjikan, kendati itoe hal tida mengoendjoeken kenjata'an, tapi sekalian gouverneur-gouverneurnja bakal ambil itoe kelakoean boeat toeladan, dari mana achirnja aken djadi loewas sampe mendjalar lebi djaoe.

Demikianlah, maka sasoeatoe Koentjoe selaloe membawa prilakoenja dengen mendjaga ati-ati pada dirinja soepaia tetep mamegang kahormatan dengen soenggoe soenggoe dan dengen onder dirasa plahan- plahan doenia toeroet itoe toeladan hingga achirnja mendjadi aman.

詩云。予懷明德。不大聲與色。子曰。聲色之以化民末也。詩曰。德輶如毛。毛猶有倫。上天之載。無聲無臭。至矣。

Si in. I hoaij beng tek. Poet taij seng i sek. Tjoe wat. Seng sek tji i hwaa bin boat ja. Si wat. Tek joe dji moh. Moh joe joe loen. Siaang thian tji tjaij. Boe seng boe hioe. Tjie ie.

A r t i n j a :

Kitab sair ada membilang:

Thian senantiasa terkenang dengan prilakoenja Nabi Boen Ong jang bisa pegang dengan oetoe kabedjikan jang berada di batinnja dan tida tjoema besarken itoe didalem soeara dan sifatnja.

Sedeng Nabi kita ada mengoedjar: Prihal mengatoer negri ada pokonja ia-poenja platoeran, jang koedoe di-oetamaken, jaitoe kebatinan, samentara pamerentahan jang meroepaken soeara dan sifat boeat bikin djadi rajat menoeroet, itoelah ada soeatoe tjara jang haroes dilakoeken di blakang sadja.

Kaloe menoeroet boeninja sair terseboet, ada mengandoeng artian bahoea kabedjikan masi ada ternjata dalem soeara dan sifat, hingga belon tjotjok. Sedeng dalem lain sair ada dibilang lagi, bahoea kabedjikan ada sebagai boeloe jang paling aloes. Ini djoega belon terlaloe betoel, kerna soeatoe boeloe jang bagimana aloes djoega toch masi ada jang menjamain.

Djadi, paling djitoe adalah oetjapannja itoe sair dari Boen Ong jang membilang, bahoea kabedjikan ada poko di seloeroe djagat, tapi lantaran teramat aloesnya hingga tida ada soearanja jang boleh terdenger dan djoega tida ada baoenja jang bisa ditjioem.

Sanget oetama dan **sanget samar** adanja itoe kabedjikan.

T A M A T.

孔 子 語 錄

KHONG TJOE GI LIOK.

Nasehat-nasehat dari Nabi Khongtjoe.

Nabi kita perna mengoedjar pada poetranja jang bernama 孔鯉—Khong Li sebagi berikoet:

Sasoeatoe Koentjoe tida boleh tida mengoetamaken pladjaran dan apabila bergaoelan selaloe berdandan dengan rapi.

Pladjaran aken goena meloewasken pengatahoeannja dan berdandan ada goena memantes dirinja.

Keada'an diri djika tida pantes djadi koerang hormat, kapan diri koerang hormat djadi tida sopan dan apabila diri tida sopan nistjaia tida bisa djadi moelia.

Maka, sasoeatoe Koentjoe djika didjaoein keliatan ada bermoeka terang, jang mana ada lantaran ia-poenja dandanan jang pantes, dan apabila didekatin poen terangnja djadi lebi njata dari sebab adanja ia-poenja pladjaran jang tinggi.

Orang jang tida mempoenjai pladjaran ada ibarat itoe tana legok, jang mana maski djadi tempat berkoempoelnja aer jang mengalir di djalan dan menoedjoeh ka sitoe, tapi kerna diatasnya lantas toemboe roempoet-roempoet aer, hingga diliat dengan begitoe sadja siapatah jang tida aken mendoega bahoea disitoe boekan ada tempat soemberan ?

**

Nabi kita ada mengoedjar begini:

Biarpoen soeatoe orang soeka menggoenaken pikiran-pikirannja, tapi djika ia tida bladjar, tida oeroeng pengatahoeannja aken tida bisa loewas; sebaliknya, kendati orang soeka bladjar, tapi kapan ia tida bisa pegang kahormatan dirinja, nistjaia tida bisa djadi moelia.

Satoe orang jang hendak membikin batinnja djadi tetep, djikaloe tida disertaken dengen soenggoe-soenggoenja hati, tentoe aken tida bisa tegoe, sedeng itoe kasoenggoean apabila tida ada kenjata'annja, biarpoen seriboe kali dibilitjaraken orang pasti tida soeka pertjaia.

Koentjoe poenja prilakoe boedi, maski pada permoela'anna ada keliatan samar, tapi lama-kelamahan ia bakal mendjadi njata; boeat kerdjaken sasoeatoe perkara tektek-bengek ia tida nanti memaksa sampe meroegiken pada kapentingan jang besar.

Siapa jang bergaoel padanja tida aken bisa merasa bosen, kerna apa jang ia omongin senantiasa ada mengandoeng arti jang loewas, dan sasoeatoe Koentjoe maski pengawakannja tida bagoes dan tida gaga, sedeng koelawarganja kendati tida oesah paksa diri boeat bikin ia-poenja nama djadi terkenal, tapi achir-achir tida boleh tida namanja bakal aken tersohor sendiri.

Ini semoea ada hasil dari ia-poenja pladjaran jang tinggi.

* *

Moerid 子路—Tjoe Louw perna menanja pada goeroenja, apakah soeatoe Koentjoe djoega ada poenja hati soesa?

Nabi kita mendjawab: Prilakoenja soeatoe Koentjoe, apabila ia belon bisa dapet ilmoe jang ditjari ia selaloe ber-bergembira ingin dapetken dan satelah ia bisa dapetken itoe maksoed ia ber-bergembira aken lakoeken agar bisa dapet kenjata'annja jang betoel. Mendjadi, sasoeatoe Koentjoe senantiasa berkeada'an goembira dan giat, kerna ia tida perna soesaken seperti getolnya itoe orang-orang jang mentjari hasil doen'a.

Prilakoenja sasoeatoe Siaohdjin ada sebaliknya, jaitoe pada sabelonnja ia bisa sampeken apa jang diniat, ia pikirin dengen hati soesa djangan-djangan ia tida bakal bisa dapet dan djikaloe soeda dapet, ia bersoesa lagi, kerna koeatir kaloe-

kaloe itoe pendapetan nanti djadi linjap kombali. Maka, itoe Siaohdjin dari idoep sampe mati senantiasa diganggoe oleh pikiran jang soesa dan ampir tida ada soeatoe hari jang penoe dimana ia bisa ber-bergembira dan bergiat.

* *

Nabi kita ada menasehatken pada moerid-moeridnya sebagai berikoet dibawah:

Batinnja sasoeatoe Koentjoe senantiasa ada terkenang dengen tiga fatsal kapentingan, jaitoe:

Pertama: Djika pada masa moedanja tida bergiat bladjar, satelah beroemoer dewasa nistjaia bakal tida mempoenjai kepan-dean soeatoe apa;

Kadoea: Kapan soeda djadi toewa dan tida mempoenjai kepan-dean, orang tentoe pikir, biarpoen ia mampoes apa maoe perdoeli sama dia, dan

Katiga: Kaloe sedeng didalem kemampoean orang tida soeka berlakoe dermawan aken menoendjang oeroesan-oeroesan jang baik, seande kamoedian ia bebalik katerdjung sial siapatah jang soedi membri pertoeloengan padanja?

Maka, sasoeatoe Koentjoe, selaloe bawa dirinja aken moempoeng masi moeda ia bergiat memboeroe pladjaran; apabila ia achirnja meninggal soepaia bisa mewarisken pladjaran-pladjaran jang baik oentoek anak-tjoetjoeknia dan sekalian sesamanja, dan djika dirinja berada didalem kemampoean, masi beringet siapa taoe brangkali soeatoe waktoe ia boleh mengalamin apes.

Ketahoeilah olehmoe sekalian, moerid-moeridkoe, demikian achirnja Nabi kita berkata, djikaloe akoe sekarang ada mempoenjai kepan-dean-kepan-dean poen ada dari lantaran tatkala masi moedakoe akoe bergiat bladjar.

* *

樂正子春—Gak Tjeeng Tjoe Tjhoen soeatoe hari koetika ia toeroen dari kantoornja, apa tjlaka, kakinja telah kesangkoet hingga djadi tjekot-tjekot.

Dari lantaran ini sakit beberapa boelan ia kepaksa tida bisa masoek kantoor, sedeng parasnya kaliatan ada mengandoeng rasa soesa.

Meliat ini keada'an ia-poenja moerid ada madjoeken pertanja'an dan berkata:

夫子—Hoe Tjo e lantaran sakit kaki hingga beberapa boelan tida masoek kantoor; sedeng Hoe Tjo e poenja paras ketampak bersoesa, kenapatah moesti begitoe?

Gak Tjeeng Tjo e Tjhoen menjaoet: Bagoes sekali apa jang kau tanjaken, moeridkoe. Akoe dapat denger dari Tjeng Tjo e bahoea ia perna denger dari goeroenja, jaitoe Nabi Khongtjoe, jang berkata: Apa jang didjelmaken oleh Toehan dan diplihara oleh boemi adalah manoesia teritoeng paling teroetama. Apa jang ajah dengen bonda lahirken dengen lengkap dan si anak bisa djaga hingga achirnja bisa poelang ka tempat asal dengen lengkap, itoelah bisa diseboet Ha u w. Jang diseboet lengkap, adalah itoe toeboe tida bertjatjat.

Demikianlah, maka sasoeatoe Koentjo e dalem bergerak dan beromong selaloe tida brani lengahken apa jang ada berhoeboeng sama orang-toeanja. Tapi, sekarang akoe telah kena bikin alpa sama apa jang diwadjibken oleh Ha u w, lantaran apa hingga akoe merasa sedi.

**

Soeatoe hari Hertog 魏哀公—Loh Aij Kong mananja pada Nabi kita sembari katanja: Soeatoe poetra jang selaloe menoeroet prenta ajahnja dan soeatoe ambtenaar jang selaloe menoeroet prenta radjanja, apatah itoe boleh diseboet djedjak (= il—Tjeeng?)

Sampe Loh Aij Kong oelangin pertanja'nnja ini tiga kali, tapi Nabi kita teroes tinggal tida maoe kasi djawaban.

Kamoedian, satelah ia moendoer dari hadepannja itoe hertog, Nabi kita tjerita pada moerid 子貢—Tjo e Khong begini:

Baroesan Loh Aij Kong ada menanja padakoe, bahoea apakah boleh diseboet djedjak adanja kaloe soeatoe poetra selaloe menoeroet prenta ajahnja dan soeatoe ambtenaar jang selaloe menoeroet prenta radjanja. Maski ia soeda oelangin pertanja'nnja itoe sampe tiga kali tapi akoe teroës tida djawab. Bagimanatah adanja pendapetanmoe, moerid 賦—So e?

Tjo e Khong dengen zonder sangsi-sangsi laloe menjaoet:

Sasoeatoe poetra jang toeroet prenta ajahnja soeda tentoe sadja berbakti dan sasoeatoe ambtenaar jang toeroet prenta radjanja ia berlakoe setia adanja, maka ada apatah poela lainnya jang goeroekoe moesti djawab !

Nabi kita djadi menggrendeng dan berkata:

Tjoepet sekali adanja kau poenja pengatahoean, hingga tida bisa mengarti sama itoe perkara. Doeckoala, soeatoe keizer lantaran ada mempoenjai ampat orang ambtenaar jang brani madjoeken nasehat-nasehat baik, membikin negrinja djadi slamet tida kena ditjaplok oleh keradja'an lain; soeatoe gouverneur lantaran ada mempoenjai tiga orang ambtenaar begitoe, membikin tana daeranja tida sampe berbahaja; soeatoe 夫—Taij Hoe lantaran ada mempoenjai doea orang penggawe jang brani berlakoe sademikian, membikin tempat pegangannya tida djadi kotor; soeatoe ajah jang ada mempoenjai poetra brani menasehatken apa jang dirasa baik, si ajah sampe tida djadi teroes melakoeken perboeatan jang tersesat dan soeatoe orang biasa lantaran ada mempoenjai kawan jang soeka berboeat begitoe, membikin ia tida kadjeblos dalem soeatoe perboeatan jang tida pantes.

Maka, demikianlah Nabi kita toetoep pembitjara'nnja,

manatah boleh diartiken berlakoe bakti dan djedjak bagi itoe poetra-poetra dan ambtenaar-ambtenaar jang main mengekor sadja pada orang-toewa atawa pada radjanja, hanja boeat boleh diseboet berbakti dan berlakoe djedjak koedoe ditilik ia-poenja tjara menoeroet ada dari perboeatan jang benar atawa kliroe.

Nabi kita ada mengoedjar:

Sikep aken manoesia membawa dirinja ada mempoenjai anem fatsal pokok kapentingan, jang mana djika bisa pegang dengen tegoe ada harepan boeat madjoe lebi djaoe aken mendjadi soeatoe Koentjoe.

Diatas aken perbaik keiskinan kapentingan ada pada pri-kepantesan, tapi soewal berbalet ada mendjadi pokonja;

Kadaneh prihal dapat soesa kewulan ada penting sans manggoesakeh peradilan, tapi kadoncah ada mendjadi pokonja;

Katigaz seatoek paprangan ada penting sans bisa meagotri buruk-burukan jang sampome, tapi pekonja ada pada kebranjan;

Kempat manggoesakeh pamantahan ada penting sans siwet jang beres, tapi soewal keparedean ada mungsimbi bagus djadi pokonja;

Kalimat mendiktaan maelutan pada soeatoe negri ada penting sans menemani karoperan, tapi menajegs stepuis tosoementeenen bisa tinggal kekal ada mendjadi pokonja, dan

Kesariah menajeg kekuhan ada penting sans bisa cari waktu, tapi pekonja ada pada teusga.

Akoe botep sekaliu moen-moenikoe soeka perkakon,

Nabi Khongtjor perta lekata pada:

Dalem manggoesakeh ususias perdon, djika jang mengendakesan sadja setia soeka manggoesakeh kira-kiraan deureu betawi

tentoe tida sampe kebatjoet; atawa goenaken kebraniannja tapi soeka bekerdja rame-rame tentoe bakal dapet kamenangan; atawa kaloe jang mengoeroes tjerdkit ditamba dengen soeka berempoek lebi doeloe, boleh dipastiken apa jang dioeroes bakal djadi beres.

Bagi orang-orang bodo tidualah begitoe. Ia-poenja kebiasaan adalah: Soeka mengasi hati pada jang disenangin, menimbang berat sebla, berkepala batoe dan satronin orang-orang jang lebi pande dari dirinja.

Ia-poenja tabeat sompong dan angkoeh, dan pandang tida mata pada moesoe- moesoena, maka, marika djika dikasi kado-kadoan jang tinggi sia berbalaja, dilaku kewaduhan peng berat nistpa bakal disedi kspirasi dan benturan soeka mengasi hati pada orang-orang jang disenangin aktifitas tentoe bisa mensabuwe kanodahan.

Moeril-moeridhoe, biadib kau orang maoe berduih dilaku perkara begitoe.

Heng Loh Aej Kang ada menuna pada Nula kru begini:

Akoe denger dari orang ijrota baboe akoe punya igdeung 甲寅年 Tong Ek Thiek ada iku wachawa kusdimuton (seperti nemocahis disebut singis aliwa singker). Apalagi itu perkakon bisa di perijia?

Nula kru ugenjewab:

Pihal kusdimuton akoe iku tida hengtengeng pada coemis, hanja sabeanu/s adtau hi krapa fatsal.

Iku belasam jang meintang-meintang aken menikim ion orang punya rongi dan mengontowangkan pada diri sendiri, nia djalan jang tida sia-sia bagi dirinya sasueute orang, nislau

melempar apa jang soeda toewa dan teroes main ganti baroe, ini ada mendjadi roema-tangga poenja tida slamet; menjingkirken orang-orang pande dan bebalik memake ambtenaar-ambtenaar jang goblok, itoelah ada tandanja negri jang tida slamet; jang soeda toewa tida mempoenjai pladjaran samentara jang moeda tida soeka bladjar, ini ada tida slametnya kasopanan dari pergaoelan, dan kaloe orang jang soetji tida soedi tjampoer-tangan, itoelah ada membawa tida slametnya doenia. Mendjadi soewal tida slamet jang penting ada lima fatsal, jang mana itoe gedong Tong Ek Thek sabenarnja tida termasoek disitoe.

Kitab sair djoega ada meloekis: 各敬爾儀。天命不叉— Kok keeng dji g i. Thian beeng poet tj heh, artinja: Djika manoesia masing-masing perhatiken pada kamoes-tiannja, takdir tida nanti bisa toeroet tjampoer. Sedeng akoe belon denger jang itoe gedong Tong Ek Thek bisa mempoenjai kakoeasahan sebagai takdir.

**

Koetika Nabi Khongtjoed sedeng doedoek iseng, moerid Tjoek Khong, jang djoestroe berada di sampingnya, telah menanja bagimanatah tjaranja sasoeatoe orang jang mendjadi pembawah?

Nabi kita menjaoet seraja memoedji katanja:

善哉汝之間也—Siaan tja ij dji tji boen ja— Baik sekali apa jang kau tanjaken. Djadi soeatoe pembawah jang mamegang kewadijiban, djika mendapat pembesar jang baik, ia haroes berlakoe sebagai adanja itoe boemi.

Tjoek Khong belon merasa poewas sama ini djawaban jang ringkes, maka Nabi kita laloe terangken poela begini:

Itoe boemi djika digali ada mengasi soember, dimana kaloe ditanemin polowidjo, maoepoen roempoet dan papoehoenan ia aken bisa toemboe. Ikan, boeloes dan lain-lain binatang aer

beridoep diatas tana; manoesia jang idoep berdiri diatasnya dan sebaliknya jang mati masoek didalemnya. Mendjadilah, boemi sabenarnja ada mempoenjai banjak djasa tapi ia tida perna sompongken itoe djasa, sedeng begitoe ia ada mengasi kagoena'an bagi doenia tida ada poetaesnya. Maka, djikaloe maoe diselidiki soewal tjaranja orang mendjadi pembawah, adalah tjoema jang bisa ambil toeladannja itoe boemi poenja keada'an sadja jang bisa menjokoepi kewadijiban sapenoenja.

Moerid Tjoek Khong achirnya djadi mengarti djoega, maka ia laloe berkata: Soe maski bodo biarlah nanti tjoba perhatiken itoe nasehat.

**

Tjoek Khong perna menanja lagi: Apakah antara itoe sekalian Koentjoed djoega ada bersaing?

Nabi kita mendjawab:

Ada, kenapa tida?! Apabila ketemoeken soeatoe kaoentoengan jang tida halal, Koentjoed bersaing dalem mengala; djika menampak soeatoe kewadijiban, Koentjoed bersaing aken kerdjaken dengen giat, dan kaloe dapetken apa-apa jang tida baik, Koentjoed bersaing aken lekas meroba.

Selainnya begitoe, sasoeatoe Koentjoed tida menjelah orang jang tenaganja tida bisa sampeken sasoeatoe pakerdja'an, tida memaksa pada orang jang memang tida bisa berboeat dan tida sesalin apa jang orang memang tida soeka. Begitoelah lantaranja, maka sasoeatoe Koentjoed tida oesah mendapat soesa.

道 德 語 錄
T O O T E K G I L I O K

Roepa-roepa prihal kabedjikan.

Di soeatoe wijk ada terjadi satoe hal jang roewet djoega, jaitoe antara soeatoe poetra dengen ajahnja telah bertengkar, sampe marika moesti dateng mengadoe pada Filosoof 王陽明—Ong Jang Beng.

Kawan-kawannja ini Sianseng soeda maoe toelak sadja kedatengannja marika itoe. Tapi, Ong Jang Beng ada poenja pikiran lain, jaitoe ia panggil kedoea-doeanja dan laloe didongengin soeatoe tjerita jang bisa membikin marika djadi terharoe. Demikianlah, koetika ini Sianseng belon mendongeng abis, itoe kedoea poetra dengen ajah boeroe-boeroe lantas minta permisi dan laloe brangkat poelang semben masing-masing matanja mengembeng aer.

Meliat begitoe, moeridnja ini Sianseng jang bernama Tjha Beng Tie laloe masoek dan menanja pada goeroenja, bahoea itoe goeroe telah kasi nasehat tjara bagimanatah hingga telah membikin marika bisa djadi mendoesin begitoe tjeput?

Ong Jang Beng kata: Akoe tjeritaken padanja halnja doeloe keizer 舜—Soen poenja kelakoean jang beroepa soeatoe poetra kliwat Poet Houw dan sebaliknya ia-poenja ajah jaitoe 諱叟—Koh Soh, ada sebagai doenia poenja orang-toewa jang menjajang anaknja.


Tjha Beng Tie djadi tjelangap tatkala mendenger itoe perkata'an dari si goeroe jang mengheranken, maka satelah ia kamekmek sasa'at lamanja sigra ia djadi menanja poela sambil menjataken herannja: Sabegitoe djaoe jang akoe denger adalah keizer Soen ada sebagai satoe poetra jang sanget Oe Hauw dan sebaliknya Koh Soh ada soeatoe ajah jang kliwat tida menjajang pada anaknja. Semoea boekoe-boekoe poen soeda melokis begitoe roepa, maka heranlah jang sekarang goeroekoe bolah mengomong jang tebalik sama sekali dari apa jang sabenarnja?

Ong Jang Beng kasi katrangan lebi djaoe: Kau moesti dengerin tjeritakoe sampe abis. Keizer Soen dalem sahari-harinja selaloe rasaken bahoea dirinja ada itoe poetra jang kliwat Poet Hauw, hingga achirnja djadi bebalik ia-poenja perboeatan-perboeatan sabenarnja ada mengandoeng jang lebi-lebi dari tjoekoep Oe Hauw; sedeng Koh Soh lantaran senantiasa pikir jang dirinja telah tjoekoep menjajang pada poetranja, hingga berachir dengen sebaliknya, jaitoe tida menjajang pada anak 不慈—Poettjoe.

Koh Soh senantiasa memikir bahoea Soen ada ia-poenja poetra, jang dari ketjil ia telah plihara sampe djadi besar dan sekarang kenapatah djoega ia tida bisa membik n senang ia-poenja hati, tapi, ia sendiri tida mendoesin bahoea ia telah kena dipengaroein oleh istri moedanja. Dengan begitoe ia masih merasa jang ia sasoenggoenja menjajang pada poetranja, tapi sebaliknya ia tida maoe mengarti bahoea ia-poenja perboeatan-perboeatan ada beroepa sanget tida menjajang. Sebaliknya keizer Soen selaloe beringet jang, ia-poenja ajah telah merawat padanja dari ketjil hingga besar, jang mana soenggoe ada menjinta padanja,

tapi, sekarang si ajah bebalik soeda tida menjinta poela jang mana tentoe dari lantaran jang ia tida bisa menjoekeopken kewadjiban Hauw pada orang toewanja. Begitoelah, kerna ia saben sari selaloe memikir bagimana tjaranja aken bisa menjoekeopken kewadjiban Hauw, hingga zonder dirasa ia-poenja kelakoean-kelakoean tamba lama tamba sanget Oe Hauw.

Sampe kamoedian satelah Koh Soh bersama istri-moedanja mendoesin dari kliroenja baroelah ia bisa balik kombali pada pokonja soeatoe ajah menjajang pada poetranja, sampe pada djeman jang blakangan orang senantiasa bisa seboet bahoea. Soen ada soeatoe poeta sanget Oe Hauw jang bisa terdapat dari doeloe hingga sekarang, sedeng Koh Soh djoega ada dapet seboetan sebagai ajah jang betoel menjajang pada poetranja.



改 正
KAY TJEENG.
Rectificatie.

Djilid 24:

Pag. 27, hoeroef 至道不行焉, itoe satoe hoeroef 行 moestinja, 凝 dan salinanna dalem pagina 28 „heng” moestinja „g e n g”.

Djilid 25:

Pag. 17, regel ka ampatblas dari bawah, diantara perkata'an: „jang memperhatiken” moesti ada perkata'an „tida” atawa moesti dibatja: „jang tida memperhatiken”;

Pag. 20, salinan kitab Tiong Jong, paling atas dari semoea bagian jang berada disitoe moestinja ada ini perkata'an: „中庸第二十九章 — Tiong Jong Tee Djie Sip Kioe Tjiang, artinja: Kitab Tiong Jong hoofdstuk 29”;

Pag. 21, regel katiga dari atas, perkata'an „biasa” moestinja „Nabi”;

Pag. 27, hoeroef 總 moestinja 聰;

Pag. 37, hoeroef Tionghoa 勝勝 moestinja 義勝;

Pag. 43, regel ka 15 dan ka 17 dari atas, perkata'an-perkata'an „katrangan” moestinja „penerangan”;

Pag. 45, hoeroef 亞 moestinja 啥.

Tertjatak oleh:
THAIJ SIANG IN KIOK
SOERABAIA
1924